

Mas di 25 scol a participa na Aruba Art Fair 2018



ORANJESTAD – Recientemente a tuma luga Youth Art Fair cu a resulta di ta un manifestacion di Arte den su totalidad, gracia na e empeño di maestronan, mayornan y di e artista hoben cu amor pa arte.

Aki ta unda cu mas di 25 scol a participa trahando obran fantastico riba tres canvas duna na nan di 2 x 1 meter, na unda e hobennan a trece lo mas precioso di loke den nan mente y curason ta e Tradicionnan di Aruba.

Scolnan cu pa prome biaha a participa ta Scol Paso pa Futuro cu a sa di entrega un bunita piesa di Dera Gay. Den e mayoria e hoben a concentra riba Dera Gay como e enfoke mas grandi cu ta e tradicion di Arubianonan, pero tambe e interes a bay na fin di aña y Carnaval. Y tambe e famia den su totalidad. E beachnan blanco y e manera pa conserva esaki tambe a bin dilanti. Desde januari lo tin un Expo di e obranan den Cas di Cultura y pa luna di juni e Expo di Dera Gay tambe lo ta habri pa publico por aprecia e obranan di nos talentonan hoben y glamoroso.

E interes di e scolnan ta haltu y ya caba na luna di maart lo acerca e mayoria pa participa sea den pintura of otro forma di arte. Pa 2019 e hoben talentoso Jody Leañez lo ta e persona encarga hunto cu un team grandi di boluntarianan pa dirigi, forma y ehecuta Youth Art Fair. E intencion ta pa laga e Feria aki di hobennan crece den talento y den magia.

Aruba Art Fair ta orguyoso di a organisa Youth Art Fair. E hoben artista Davina Robles a trece 7 bunita piesa cu e la crea durante añanan y esun mas menciona tabata e Blenchi. Davina ta crea arte den colornan bibo y yamativo y ta concentra riba e naturalesa di Aruba. Un hoben cu ta dedica na Arte y deporte. Davina ta den e TOP 5 di Track running y esaki entre e hende grandinan. Noor Pieterse, Angelina Arens, Daimerly Gibbs, Eefje Steeghs Mia Bella Dragonetti Meza, ta entre otronan artistanan cu a participa. E hoben Christiaan Ponse tambe a resalta cu su pinturanan y su manera di trece arte como si fuera e ta biba y por sali na cualkier momento di e pintura.

Prometedor ta e artista hoben Ivy Ann Bryson, cu a refleta sublime obranan cu un mensahe puro y divino. E hoben ta capta e esencia di su idea y pensamiento den e forma bibo di Arte. E manera cu e hoben aki ta trata su obranan, su empake y dedicacion y amor na conservacion di cada piesa a hala masha atencion. Pero tambe su manera di crea obranan di interes manera e Unicorn cu ta honra su presencia den e galeria di ArtisA na San Nicolas.

Pa 2019 e hoben talentoso Jody Leañez lo ta e persona encarga hunto cu un team grandi di boluntarianan pa dirigi, forma y ehecuta Youth Art Fair. E intencion ta pa laga e Feria aki di Hobennan crece den talento y den magia.

Aruba Art Fair 2018, Tabata posibel traves di Partnership cu entre otro, Aruba Tourism Authority Sui Generis, Prins Bernard Fonds Caribe, Unoca, Divi Resorts Aruba, Kooyman BV, AIS, Aruba Hyatt Resorts & Casino, Departamento di Cultura (DCA) y VNO.

